

Seken Pita

Nægkiariien sə rani mə nəfe i nəkukuə

Nəp̄in riti ipaka ti nuk 66, Pita r̄irai nəkukuə sə ro kəru irə revən ti nakalasia me fwe profens nəha kani mə Esia Maenor. Nəmisəien sə kinamo ia nakalasia me nəha fwe Esia Maenor rino sampam. Mətə nahatən eikuə me həuvehe mwi ti nirəha. Pita r̄ini pen ti nakalasia me mə irəha tuhəukurən amasan nari nənə mhərer əknek̄in ia nahatətəien səvənraha. Noien nəha trəkoui raka nahatən eikuə me ti nirəha. Pita r̄ini pen mə Kumwesən trouraha nahatən eikuə me. Ti nəri nə mə Iesu Kristo tru-vehe mwi, Pita r̄ini pen ti nakalasia me mə tuharə ia narəien sə ro ikinan.

¹ Iou Saemon Pita, iou iərmama riti sə iakamo tukwini nari m Iesu Kristo, nənə, iou aposol riti səvənhi.

Iakamrai nəkukuə i m kimiaha nərmama me səməme hiaməuvehi nahatətəien riti sə krouamasan pik rouəmnəmwhen a ia nahatətəien səkimaha. Hiaməuvehi nahatətəien ia noien atukwatukw səvəi Kumwesən mine iərmama sə rauvehim̄iru kitaha Iesu Kristo.

² *Pwəh namasanien mine nəmərinuien krouvehe rouasori mwi tukumiaha ti nəri nə mə hiəukurən Kumwesən mine Iesu Iərimənu səkitaha.

*Noien me nərmama tuho trahatən pen mə irəha
həukurən amasan Iesu Kristo*

³ *Ia niskaiien səvəi Kumwesən, in ruvei pehe

* **1:2:** Jut 2 * **1:3:** 1Tes 2:9

m kitaha narimnari me pam s@m@me tsam@keikei mh@uvehi s@v@i n@im@ruien m@ne noien me s@m@me hatukwatukw n@n@ rer@n ragien tukwe. Narimnari me n@ha h@m@ier pehe tukutaha t@ n@ri n@ m@ kitaha s@ukur@n Kumwes@n s@ in r@n@kwe@n kitaha m@ ts@uvehi p@ri nasori@n s@v@nhi m@ne namasani@n s@v@nhi. ⁴ Ia narimnari me n@ha, in r@m@uvei pehe m kitaha promes keikei me s@v@nhi hasori p@k. In r@m@uvei pehe promes me i m@ tih@uvehi pw@h hasitu ia k@m@iaha hiaraka ia noien @r@ha me s@v@i t@pr@n@ i s@m@me kamhouraha n@mama t@ n@ri n@ m@ ir@ha hokeikei p@k m@ tuho, n@n@ hi@ukur@n nuveheien mh@ kuatia ia n@im@ruien s@v@i Kumwes@n.

⁵ Ro iam@nha ir@ k@m@iaha tih@m@keikei mhousari mhakutan pen noien me i ia nahat@t@ien s@k@m@iaha. Tih@kupw@n mhakutan pen noien amasan, n@n@, n@p@n hi@nakutan pen raka i, hiakutan pen mwi nukur@nien, ⁶ *n@n@, n@p@n hi@nakutan pen raka i, hiakutan pen mwi noien i s@ hiam@kou@ atukw k@m@iaha, n@n@, n@p@n hi@nakutan pen raka i, hiakutan pen mwi n@rerien s@ hiam@rer @knekin ir@ ia n@p@n me, n@n@, n@p@n hi@nakutan pen raka i, hiakutan pen mwi noien i s@ hiam@ narimnari me s@m@me Kumwes@n rokeikei, ⁷ n@n@, n@p@n hi@nakutan pen raka i, hiakutan pen mwi nokeikei@n i s@ hiamokeikei p@vtaha me ir@, n@n@, n@p@n hi@nakutan pen raka i, hiakutan pen mwi nokeikei@n i s@ hiamokeikei n@mama me pam ir@. ⁸ Ramasan m@ tiho noien me n@ha. N@p@n noien me n@ha rasori p@k ia n@im@ruien s@k@m@iaha, ro k@m@iaha hi@pkar@ au@r a mh@, m@t@ k@m@aha

* 1:6: Kal 5:22-23

tihəukurən amasan Iesu Kristo Iərimənu səkitaha, nənə nimiruien səkimiaha trukua mo kwənkwan. ⁹ Mətə iərmama sə rīpko mhə noien me nəha in rəmwhen iərmama sə nənimen rīfwə ko rīpkəti pen mhə isipwīn, nənə in rīnenouenou mə Iesu rīnaikuas raka noien ərəha me səvənhi səməme in rīno fwe kupwən.

¹⁰ Ro iamīnhi irə piak me tihaməkeikei mhousari əknekīn mə tiho noien me nəha, nənə ramahatən pen mə Kumwesən rīmərfi pərhiēn kīmiaha, məkwein kīmiaha mə kīmiaha nərmama me səvənhi. Ro pen trīni mīnuə hiamo noien me nəha ko hiəpkīmwei mhə nəpīn riti. ¹¹ Nənə nəpīn Iesu Kristo Iərimənu səkitaha truvehe irə, in truvehimīru kīmiaha, nənə, məseni kīmiaha hiəuvnīmwə ia nītətə səvənhi sə in trərimənu irə ia nuk nuk me.

Nəgkariien səvai profet me ia Nəkukua Ikinan

¹² *Ro pen nəpīn me pam takaməkeikei mo a pwəh rerīmiaha ramrhi narimnari me i, nəri auər a mə hiəukurən nənə mamhərer əknekīn ia nīpərhiēnien sə hiəuvəuvehi raka. ¹³ *Nəpīn iakamīru ihi ia nīpwrak i, rerīk ramrhi mə ratukwatukw mə takini nəgkariien i məsuəpwiri kīmiaha irə pwəh rerīmiaha ramrhi, ¹⁴ *ti nəri nə mə iakukurən mə trīpko mhə tui iakemhə, məpwəh nīpwrak i rəmwhen ia Iesu Kristo Iərimənu səkitaha ruvəni pehe raka tukw iou i. ¹⁵ Nənə takaməkeikei məmwur nəha təkwtəkwuni mə tihəpwəh nenouenouien ia narimnari me i nəpīn iakuvamhə raka mier ia tīprənə i.

* **1:12:** Jut 5 * **1:13:** 2Tes 3:1 * **1:14:** 2Kor 5:1, Jon 21:18-19

16 *Nəp̄in iahaməni irapw tukumiaha mə Iesu Kristo truvehe mwi ia niskaiien, iahəpk̄ini mhə kwənagei me irə səməme iərmama rani a ia nətərigien səvənhi, mətə kimrahar iaharənətoni atukwatukw ia nənimemrahar niskaiien mine nukuraanien asori səvənhi. 17-18 *Iakani iam̄inhi irə ti nəri nə mə fwe kupwən, kimrahar^a iahamaravən ia təkuēr ikinan kimaha Iesu. Ia nəp̄in nəha Tata Kumwesən ruvei pen nisaiien m Iesu, nənə mo nukuraanien rəhiapw mier ia n̄ipwran, nənə reri Kumwesən rini mə, “In i nərik keikei, rerik ragien pik tukwe.” Kimrahar iaharregi nəgkiariien nəha ruku pen fwe ia neiai muvehe.

19 Kitaha səukurən mwi mə nəgkiariien səvəi profet kupwən me ro n̄ipər̄hienien. Ramasan mə kimiaha tihətərig amasan irə ti nəri nə mə nəgkiariien səvəi profet kupwən me rəmwhen ia laet sə raməhiapw ia nəpitəvien. Laet nəha traməhiapw iam̄inha irə meste ruvəran pen ia nəp̄in asori nəha nənə koufətəteia rutə ia rerimiaha. 20 Nəri sə tihəkupwən mhəukurən ro iam̄inhi irə. Nəgkiariien me pam səvəi profet me ia Nəkukuə Ikinan riti riwən in nəgkiariien atukw səvəi profet riti. 21 *Iakani iam̄inhi irə ti nəri nə mə profet me hənəpk̄ini irapw mhə nətərigien atukw səvənraha, mətə irəha nərmama səməme Nənimw̄in Ikinan riri irəha mo irəha həni irapw nəgkiariien sə ruku pen ti Kumwesən.

2

* 1:16: Mat 17:1-5 * 1:17-18: Mat 17:5 a 1:17-18: Irəhar
nə Pita, Jemes, mine Jon * 1:21: 2Tim 3:16, 1Pit 1:11

Nahatən eikuə me Kumwesən trouraha irəha

¹ *Mətə fwe kupwən profet eikuə me nəha ikin ia reri nəkur Isrel. Ia noien a mwi nəha kimiaha tihətoni nahatən eikuə me ia rerimiahā. Irəha tuhəuvehe afafa, mhahatən kimiaha ia neikuəien me səməme tuhouraha nari. Irəha tuhəni mə rekəm rīpko mhə Iesu in iəmə asori sə rīnərəku raka irəha meivinari ia nirəha. Tī noien nəha kamho Kumwesən trouraha akwauakw irəha. ² Nərmama həpik tuhəkurirə pen nahatən eikuə me nəha ia noien ərəha sə irəha kamho ramo naurisien. Ro iamīnhi irə nərmama nepwīn mwi tuhəni ərəha suatuk səvəi nīpərhiēien. ³ *Tī nəri nə mə nahatən eikuə me nəha hokeikei pīk mane, irəha tuhəni neikuəien me m kimiaha mə tihəuvei pen mane mīnraha. Kumwesən ruvəni raka tui ia Nəkukuə Ikinan mə trərpwīn noien ərəha me səvənraha, nənə, mīnərər mwatuk mə trouraha irəha məpwəh napriēien.

⁴ *Kimiaha hiəukurən. Fwe kupwən, nəpīn nagelo me nepwīn hənə noien ərəha, Kumwesən rīpkəkwtəmhiri mhə nərpwīnien səvənraha, mətə rīnərihi irəha ia jen, mərarki pen irəha ia kwopun riti fwe inhəripw^a mə tuhamarə ikin ia nəpitəvien meste nəpīn in trərpwīn noien ərəha me irə. ⁵ *Nənə Kumwesən rīpkəkwtəmhiri mhə nərpwīnien səvəi nərmama kupwən me səməme kamhərui nəkwān ia nəpīn səvəi Noa,

* **2:1:** Mat 24:11, Jut 4 * **2:3:** Rom 16:18, 1Tes 2:5 * **2:4:** Jut 6 a **2:4:** Ia nəgkiariēien Krik, kwopun nəha inhəripw sə Pita rani nəghīn nə Tartaros. Nəkur Kris hāməni kwopun nəha mə kwopun kamərpwīn noien ərəha me ikin səvəi nənimwīn ərəha me mīne nərmama me səməme hənərui nəkwai Kumwesən. * **2:5:** Jen 6–8, 8:18, 2Tes 3:6

mətə r̄inouraha irəha ia nui asori. Mətə Noa r̄iməni irapw n̄əgkiariien s̄əv̄əi noien atukwatukw, n̄ənə Kumwesən ruvehimiru in mine n̄ərmama me s̄əv̄ənhi irəha pam sefen. ⁶ *N̄ənə Kumwesən r̄ino n̄ərpwinien ti n̄ərh̄aien s̄əv̄əi n̄əkur Sotom mine Komora, r̄iməuvani taon mi n̄əha ia napw krouo nimwrakw ia nirau. In ro iam̄inha irə mə trahatən n̄əfe tro m̄ n̄ərmama s̄əm̄əme kamh̄əruī n̄əkwan. ⁷ *Mətə in r̄iməuvehimiru Lot. Iəm̄ə n̄əha in iəm̄ə atukwatukw, n̄ənə rerin ram̄əmis̄ə ti noien ərəha s̄ə ramo naurisien s̄əv̄əi n̄əkur ərəha me n̄əha ikin. ⁸ In ramarə irəha m̄inraha, mam̄ətoni noien ərəha me n̄əha kamho, mam̄əregi n̄əgkiariien ərəha me n̄əha kamh̄əni, ia n̄əp̄in me pam rerin s̄ə ratukwatukw ram̄əmis̄ə p̄ik tukwe. ⁹ *Narimnari me n̄əha ramahatən mə Iər̄imənu rukurən nuvehimiruien n̄ərmama me s̄əm̄əme kamh̄əs̄iai in, mamho noien me s̄ə in rokeikei, n̄ənə rukurən n̄ip̄eki rakaien irəha ia n̄ərh̄aien s̄ə kamharə irə. Mətə n̄ərmama s̄əm̄əme h̄əp̄katukwatukw mh̄ə Kumwesən rukurən n̄ərpwinien noien ərəha me s̄əv̄ənraha t̄əkw̄t̄əkw̄uni, marə mo tukuahag mwi irəha r̄əm̄when ia n̄ərmama ia kalapus, mamev̄ən meste in truvei pen n̄ərpwinien sampam m̄inraha ia n̄əp̄in kurirə. ¹⁰ *Kumwesən truvei pen n̄ərpwinien m̄ n̄ərmama ərəha me pam, mətə truvei pen n̄ərpwinien asori m̄inraha n̄əha s̄əm̄əme kamhesi pen noien əmkemik me n̄ip̄wranraha rokeikei p̄ik, mamh̄ətə ərəha nasoriien s̄ə kauvehi kam̄ərim̄ənu irə.

Nahatən eikuə me n̄əha s̄əm̄əme iakam̄əgkiari ia nirəha, irəha kamh̄ərpwi irəha, mamho

* **2:6:** Jen 19:24, Jut 7 * **2:7:** Jen 19:1-16 * **2:9:** 1Kor 10:13,
Jut 6 * **2:10:** Jut 7-8,16

kənkəpwənrəha, mamhəni nəgkiariien ərəha me ia nagelo me ia neiai mhəpwəh nehekiriien.

¹¹ *Nəri auər a mə nagelo me nəha irəha həskai nənə nəgsenrəha rasori məpi raka nərmama me nəha, mətə irəha həpkini ərəha mhə irəha riti ia nəmri İərimənu. ¹² *Mətə nahatən eikuə me nəha kamhəni ərəha nərimnari me səməmə irəha həpkukurən mhə. Irəha həmwhen ia nəri əprmin me nətərigien səvənrəha riwən, mətə kamho a nari sə hokeikei. Nəri əprmin me nəha kiməkwhi irəha mə kwənkru trousi tərini irəha, kousi əpune irəha. Kumwesən trourəha mwi nahatən eikuə me nəha rəmwhen ia nəri əprmin me nəha.

¹³ *In trərəku irəha ia nərəhaien ti nəri nə mə irəha həno nərəhaien m nərmama. Ia nətəien səvənrəha noien i ramasan pik mə ia rukwəsikər tuhəni pik nari mhənimwi pik. Irəha həmwhen ia tinarı əmkemik, uə təmwki nımwəpw sə ramo auris kimiaha. Irəha həuvehə mhəni nari kimiaha minrəha, mətə kamheikuə ia kimiaha rerinrəha ragien a. ¹⁴ Ia nəmrinrəha kamhətə pik nıpran me, mamhakres irəha, mhəpkəpwis mhə ia noien ərəha. Irəha kamhəvi nərmama səməmə nətərigien səvənrəha rıpkiskai mhə mə tuhəvən mho noien ərəha. Rerinrəha rokeikei pik mane. Kınahatən amasan irəha irə. Irəha nıpwənəti nərəhaien Kumwesən raməkwein ərəha ia nırəha!

¹⁵ *Irəha hənəpwəh suatuk sə ratukwatukw, nənə mhəikou mamhesi pen suatuk səvəi Palam tini Peor, iərmama sə rokeikei pik nuvehien mane ia noien ərəha. ¹⁶ *Mətə togki riti rınəski ti noien

* **2:11:** Jut 9 * **2:12:** Jut 10 * **2:13:** Jut 12 * **2:15:** Nam 22:7, Jut 11, Rev 2:14 * **2:16:** Nam 22:28-35

ərəha me səvənhi. Kitaha səukurən mə togki rīpkəgkiari mhə, mətə Kumwesən rīno togki rəgkiari ia reri iərmama mə trīnise noien ikou səvəi profet nəha.

17 *Nahatən eikuə me nəha hāmwhen ia nəmri nui me sēməme hənəmə, uə nəpuə sə nīmətagi rīməpeki raka nənə nesən riwən irə. Kumwesən rīnəpnəpenə raka ia nəpitəvien asori mə səvənraha. 18 *Irəha kamhəfiətə ia nīrəha me, mamhəni nəgkiariien arməri me, mamhəvi nəmə me sēməme həpkaraka a i ia nəkur kamharə ia nəpitəvien mə tuhəuvehe mho noien ərəha me sə ramo naurisien nīpwranraha rokeikei pīk. 19 *Irəha kamhəni pen tī nəmə me nəha mə tukeivinari ia nīrəha, mətə nahatən eikuə me nəha irəha slef me səvəi noien sə ramouraha nərmama. Iakani iamīnhi irə tī nəri nə mə iərmama riti in slef səvəi nəfe noien sə ramərimənu irə. 20 *Iesu Kristo in Iərimənu səkitaha, nənə, in mwi Iərmama sə rauvehimīru kitaha. Nərmama sēməme həukurən in həukurən narakaien ia noien əmkemik me səvəi tīprənə i. Mətə mə hərərig pen mwi kurirə ikīn, noien me nəha həkwi mwi irəha, mamhəuvehi irapw nīskaiien səvənraha, tuharə ia narəien sə rərəha məpi raka narəien sə kupwən. 21 *Trīni mīnuə irəha hamreirei anan suatuk səvəi natukwatukwien, ramasan pīk məpi raka mə irəha həuvəukurən suatuk nəha nənə kurirə irə həuvsini pen təkutanraha ia nəgkiariien ikinan sə Kumwesən rīməuvei pen mīnraha. 22 *Noien səvəi nərmama me nəha ramahatən mə nəgkiariien i

* 2:17: Jut 12:13 * 2:18: Jut 16 * 2:19: Jon 8:34 * 2:20: Mat 12:45
 * 2:21: Luk 12:47-48 * 2:22: Prov 26:11

kamini rerin ro niparhienien: “Kuri reuə mirərig pen maməni newəien səvənhi. Kinəvərui raka pikə revən mamaru mwi ia nəmtigei.”

3

Nəpin nəha kani mə nəpin səvəi Iərimənu

¹ *Nərmama keikei me, in i nəkukuə səiou sə ro kəru irə rauvehe tukumiaha. Iakimərai irau pəri mə takəsəpəwiri nətərigien atukwatukw səkimiaha ia nirau, pwəh rerimiaha ramrhi ² *nəfe profet ikinan me fwe kupwən haməkupwən mhəni irapw mə tuhəier pehe mine nəgkiariien i Iərimənu sə rauvehimiru kitaha riməni pehe tukumiaha ia tərhuī aposol me səkimiaha.

³ *Nəri sə tihəkupwən mhəukurən ro iamīnhi irə. Tramevən ipaka ti nəpin sampam nərmama nepwīn tuhəuvehe irəha tuhamesi pen nəfe noien ərəha me nətərigien səvənraha rokeikei. Irəha tuharis ia Kumwesən, ⁴ *mhəni mə, “Rəfo? Riməni mə truvehe mwi, mətə in pəku? Nəpin kaha me səkitaha hāmamhə meste pehe nəha təkwtəkwuni narimnari me pam həpkopəiti mhə kamho a iamīnhi irə. Fwe kupwən anan, nəpin kino tīprənə meste pehe təkwtəkwuni, narimnari me pam kamho a nari kuatia.” ⁵ *Kamhəni iamīnha irə mətə irəha həpkokeikei mhə mə tuhətərig fwe tui anan ia nəgkiariien səvənhi Kumwesən ro neiai mine tīprənə, nənə mo tīprənə rutə ia kurkwai nui, muvehi nui mo kwopun me pam ia təkure

* **3:1:** 2Pit 1:13 * **3:2:** Jut 17 * **3:3:** 1Tim 4:1, Jut 18 * **3:4:** Aes 5:19, Esik 12:22, Mat 24:48 * **3:5:** Jen 1:6-9

tīprənə irə, ⁶* nənə marə makiətənimw mwi tīprənə kupwən, mouraha ia nui nəha. ⁷ Nəgkiariien nəha səvəi Kumwesən raməkwtəmhiri neiai mine tīprənə krauarə təkwtəkwuni. Irau trouarə roueste nəpīn in truvani irau ia napw ia nəpīn sə in trərpwīn noien ərəha me irə səvəi nərmama səməme kamhərui nəkwān, mouraha irəha.

⁸ *Mətə nərmama keikei me, tihəpwəh nenouenouien nari kuatia i mə ia nətərigien səvəi Iərimənu nəpīn kuatia rəmwhen ia nuk wan-taosen, nənə nuk wan-taosen rəmwhen ia nəpīn kuatia. ⁹ *Nərmama nepwīn rerīnraha rīrhi mə Iərimənu ramo tīpwə ti noien nəgkiariien səvənhi ruvehe mukuə, mətə rīpkō mhə iamīnhi irə. In ramo nətərigien səvənhi raməpwəmwīs mə trameitenhi kīmiaha. In rəpwəh nokeikeien mə iərmama riti tremhə kouraha in, mətə rokeikei mə nərmama pam tuhərərig ia noien ərəha me səvənraha mhəuvehe tukwe.

¹⁰ *Mətə nəpīn i kani mə nəpīn səvəi Iərimənu truvehe rəmwhen ia rakres. Ia nəpīn nəha, tsəregi nurīgrigien asori. Kəpuapen triwən. Napw trahi meri mine məkwə mine kəməhau me. Irəha tuharīs mhəiwən. Nənə nəpnəpanien tro tīprənə mine narimnari me pam kamharə irə tuhəiwən.

¹¹ Tī nəri nə mə Kumwesən trouaha pam narimnari me nəha ia noien nəha, hiəukurən mə tihəfarə irə. Kīmiaha tihaməkeikei mharə ia narəien sə ro ikinan i, mamho narimnari me səməme Kumwesən rokeikei, ¹² *mamheitenhi nəpīn i kani mə nəpīn səvəi Kumwesən, nənə,

* **3:6:** Jen 7:11-21, 2Tes 2:5 * **3:8:** Sam 90:4 * **3:9:** Hab 2:3,

1Tim 2:4 * **3:10:** 1Tes 5:2, Mat 24:29,35 * **3:12:** Aes 34:4

mamhəmwur ia noien wok sə tro nəpɪn nəha tru-
vehe akwauakw. Ia nəpɪn nəha nəpnəpanien tro
kəpuapen mouraha narimnari me pam irə. Nənə
napw trahi meri mine məkwə mine kəməhau me.
Irəha tuharis mhəiwən. ¹³*Mətə kitaha sameitenhi
nəgkiariien səvəi Kumwesən mə truvehe mukuə.
In rıməni mə tro neiai vi mine tɪprənə vi, kwopun
riti sə narimnari me hatukwatukw a tuhamarə
ikɪn.

¹⁴ Ro pen nərmama keikei me, ti nəri nə mə
hiameitenhi narimnari me i tihousari əknekɪn
mə Kumwesən trəpwəh nətoniien nəmkekɪkɪen
riti ia nımɪruien səkimiaha, uə noien ərəha riti
triwən ia nımɪruien səkimiaha, nənə tiharə ia
nəmərɪnuien kimiaha min. ¹⁵*Tihaməkeikei
mhəukurən mə nətərigien səvəi Iərımənu səkitaha
rəpwəmwɪs ti neitenhiien kitaha. In ramo mə
truvehimɪru nərmama nepwɪn mwi. Rəmwhen
ia nəgkiariien sə piəvtaha keikei Pol rımərai m
kimiaha mesi pen nukurənien sə Kumwesən
rıməuvei pen min. ¹⁶ Ia nəkukuə me pam
səvənhi raməgkiari ia narimnari me nəha. Ia
nəkukuə me nəha, narimnari me nepwɪn nəha
ikɪn həknekɪn ti nukurənien. Nərmama səməme
həreirei nari nətərigien səvənraha ramaiuaiu,
irəha kamhəuvsini nəgkiariien me səvəi Pol,
ia noien a mwi nəha irəha kamhəuvsini mwi
nəgkiariien me nepwɪn ia Nəkukuə Ikinan. Nənə
Kumwesən trouaha irəha tukwe.

¹⁷*Ro iamɪnhi irə, nərmama keikei me, ti
nəri nə mə kimiaha hiəuvəukurən raka nəri i
kurirə rier pehe, tihaməkeikei mhəsiari kamo

* **3:13:** Aes 65:17, Aes 66:22, Rev 21:1,27 * **3:15:** Rom 2:4, 2Tes

3:9 * **3:17:** Mak 13:5,33, 1Kor 10:12

nægkiariien ərəha me səvəi nərmama səməme kamhərui nəkwai Kumwesən həvi raka kımiaha ia kwopun səkımiaha hiamərer əknekin ikın, nənə, hiəmwei. ¹⁸*Mətə tihəuverə ia namasanien mine nukurəniēn səvəi İərimənu səkitaha İesu Kristo. In nəha iərmama sə rauvehimiru kitaha.

Pwəh nasoriēn revən tukwe in ipwet mine ia nuk nuk me. Ouəh, pwəh ro iamıhi!

* **3:18:** Jut 25

Nəkukuə Ikinan
The New Testament in the Nafe (Kwamera) language
of Southeast Tanna, TAFEA Province, Vanuatu
Niutestamen long lanwis Nafe blong Vanuatu.
Le Nouveau Testament dans la langue Nafe de
Vanuatu.

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

PDF generated using Haiola and XeLaTeX on 11 Nov 2022 from source files dated 30 Nov 2021

26b0f540-c192-5878-be67-18ede9ab1416